



# Die Aabrennte Fasnacht 2017

Unsre Taxi-Chauffeur bysst ins Länggrad und schreit blind vor Wuet:  
«Ich will, dass dr Kanton dä Uber-Seich jetzt ganz verbiete duet.  
I faar zum Roothuus und hau dene Glöön mol zümfing uf dr Tisch,  
Wenn y numme wüsst, wo dä kaibe Määrtplatz isch»

Dr Arnold Gjergjaj stoot im Ring in London vor em David Haye,  
Dr Gjergjaj isch no nit KO, aber au nümm ganz okay.  
Do grinst dr Haye und meint: «Hey Bürschtli, you're for me e gleine Fisch,  
I show you in zwei Runde, was en ächte Brexit isch.»

Es hilft kei Glaube und kei Bätte für Muslime do am Ryy,  
Es entscheidet s Gericht in Stroosburg, schwimme leere, das muess syy.  
Är begriesst dä Schwimm-Entscheid, meint do dr Nägelin nur knapp,  
Well si Jöbbli als Regierigsroot syg au bach ab.

Es schüümt dr Erdogan vor Wuet, es git scho fascht e Schwimmbad druss:  
«Dr Böhmermaa het gseit, mi Kiini gsäächi wien e Hooden us!»  
Mir finde, das sprängt jetzt dr Raame, sone Wirbel isch doch grangg,  
Well so ne Schmäägedicht, dämm seit me z Basel Schnitzelbangg.

Sy sinn schmagghaft, gsund und günschtig und sogar fürs Klima guet,  
Kei Wunder, dass jetzt au dr Wirt do scho Insekte koche duet.  
Au s Heidi Mück macht mit und meint sy heig scho Emissionen gspart,  
Sit sy konsequänt nur mit em VW Käfer faart.

«Ritsch-Ratsch» mache d Nati-Trikots, mir hännns live im Färnsee gsee,  
Und glyy drufaabe gits bim Migros keini Blastigg-Seggli mee.  
Die Ähnlichkeit, die isch frappant, jä Si, das ka kei Zufall syy,  
Well au die verrisse, kum steggsch dört e Fläsche dryy.

Nämme Sy blatz, wo druggt dr Schue? Verzelle Sy mir mee drvo,  
Aha... jäsooo... jähä... Momänt... Y muess mol schnäll ufs WC go.  
Duets denn Weh, wenn y do druggt?... Ah, nei das isch dr falschi Arm,  
Sage sy mol «Aah» wie «Asthma», denn lueg ich no schnäll in Darm.  
Mache Sy sich doch mol frei ... jä ... denn wänn mer emol loose,  
Ou... Das döönt nach Psycho-Pseudo-Gastro-Läggmer-Faszinose.  
Y weiss halt au nit... Uns empfiilt do myni Enzyklopädie,  
Als erschts en Ooderlass und denn e Grientee-Ylauf hindedryy.  
Ou, scho halb vieri?... I muess loos, zaale sy d Rächning schnällsch tensyy.  
Dasch e Konsultation... bim Doggder Morin gsi.

Mir sinn im Trend und fange dääglig jetzt so Poke-Monschter yy,  
Mir zeigen line d Sammlig do uf unsrem Samsung Galaxy.  
S Poke-Dürr faart mit Mercedes und Privat-Eskorte vor,  
S Poke-Mück findsch nur in bsetzte Hüüser und s dreit Rasta-Hoor.  
S Poke-Wessels frisst gärn Parkplätz und als Schmugg dreits Velo-Ring,  
In dr PUK dört wirsch au fündig, dört sitzt s Poke-Wäber dinn.  
S Poke-Somm frisst gärn e Zyttig und macht denn e bruune Gagg,  
S Poke-Shiva us dr Zuekunft goot eim ständig uf dr Sagg.  
S Poke-Frehner läbt verstegett, well s könn e Poke-Blocher koo.  
Und mit sym Gschwätz ka s Poke-Morin jede Find yyschloofe loo.  
Am Schluss kunnt s Poke-Nägelin vo rächts und findets schampar toll,  
Mir sage: «Sorry, aber unser Speicher isch scho voll.»

## Ode an d Melania

Melania, ou nei di Maa, jo mir wüsse, s isch nit eifach,  
Du bisch jung, kasch nüt drfüür, s Luxusläben isch halt düür.  
Drum hesch ein gsuecht, ungeniert, wo die Lifestyle finanziert,  
Und dass dä statt me Hirn e Schwumm het, het di nit interessiert.

Melania, me seets dir aa, e Suger daddy hät dir glänggt,  
Aber nei, das hätsch nie dänggt, jetzt wird dä Typ no Presidänt.  
Du hesch ghofft, dä isch scho alt, die paar Joor göön schnäll verbyy,  
Und jetzt muesch du jeden Oobe sy Orangeprässi syy.

Kumm doch zu uns, e guete Root, grad wenn s dir ums Üssre goot,  
Si Taint isch zwor glatt und orange, aber unsri Hoor sin root.  
Bevor är dir an Kraage goot, flücht zue uns in diner Not,  
Kumm hau ab, s isch noonig d spoot, solange die Muere noonig stoot.

Melania, dasch s Schlimme draa, du blybsch für immer bi dämm Gloon,  
Und unsri Rettigsmision, blybt vorderhand no ooni Loon.  
Drum isch unsrig Hoffnig nur, du sygsch doch nit dumm wie Brot  
Und wenn är dr rot Knopf will drugge, di sanfti Hand derzüsche goot.